

Baratto igl bastung da hockey cun la palotta

Gion Nutejn Stgier/FMR

Persungas prominentas èn savens giasts aint igl Berghuus Radons tar Fadri Arpagaus. Per en'acziun da promoziun da «graubündenVIVA» ò el cuschino cun quatter persungas ancunaschaintas. Egna da chellas: igl star hockeyan Nino Niederreiter.

Igl Berghuus Radons veva gio en bung nom cura tgi Gianni e Ruth Savoldelli on mano chella tgesa aint igl territori da skis da Savognin. Cun surpiglier Fadri Arpagaus igl 2020 igl hotel e restaurant è chella tgesa s'avanzada tar egna dallas miglras adressas aint igl Grischun.

Igl cuschinier surmiran tg'ò fatg igl sies amprendissadi da cuschinunz aint igl hotel da tschintg steilas «Waldhaus» a Segl ò cuschino segl antier mond avant tgi turnar ainten la sia patria, per exaimpel a Bangkok, an Canada, ainten l'America, an Frantscha, an Grezia e sa tgapescha er an Svizra. An chels onns aint igl exteriur ò el er cuschino savens per persungas prominentas da films, da sport e dalla politica.

Er aint igl Berghuus Radons ins antopa adegna puspe l'egna u l'otra persunga prominenta tgi sa lascha eir bagn e giolda la cuschna da Fadri Arpagaus. Per en'acziun da promoziun dall'organisaziun «graubündenVIVA» ò igl cuschinier, ustier e hospitant digl Berghuus betg cuschino angal per quatter persungas tg'ins canoscha bagn, mabagn schizont cuschino communabel cun chellas. Chegl èn l'antieriura biatleta Selina Gasparin, igl actour Andrea Zogg, igl musicist Stämpf ed igl star da hockey Nino Niederreiter.

Cuschino raviauls dalla tatta

La seria da videos da «graubündenVIVA» sa nomna «brutal lokal» ed ella è neida produkteida a Radons aint igl Berghuus cun e tar Fadri Arpagaus. Cuschino ò el quatter speisas diversas e chegl communabel cun las quatter persungas prominentas. Cun Selina Gasparin, l'antieriura biatleta ò Fadri Arpagaus cuschino steaks da biestg gross Wagyu (Wagyu-Rind), animals dalla tratga digl pour Andreas Stgier da Parsonz. Communabel on Fadri Arpagaus ed igl actour grischun Andreas Zogg cuschino capuns, bagn egna dallas pi ancunaschaintas tratgas tgi dat aint igl cantun. Giast cuschinier tigl hospitant digl Berghuus è er sto igl musicist Stämpf. Cun el ò Fadri Arpagaus fatg biscuits (Totenbeinli) e sa divertia durant far igl video. Baratto igl ba-



Nino Niederreiter (san.) e Fadri Arpagaus on cuschino an cuminanza raviauls.

stung da hockey cun la palotta da cuschinar ò alloura igl star da hockey Nino Niederreiter. An cuminanza cun Fadri Arpagaus ò igl hockeyan internaziunal cuschino raviauls, tenor igl recept da Matilda Arpagaus, la tatta digl patrung digl Berguus Radons.

«Sung nign grond cuschinier»

Cuschino on Fadri Arpagaus e Nino Niederreiter raviauls, egna dallas miglras tratgas tgi dat aint igl Berghuus Radons. Chegl alloura er tenor igls experts digl Gault Millau.

Durant igl cuschinar igls raviauls ò Nino Niederreiter rachinto tg'el seia daveiras nign grond cuschinier. Igl star hockeyan ò er managea igl suandont: «Te Fadri survignst sieir utschels cun vaseir scu tg'ia sung ve da far igls raviauls e truschier la pasta.» Digl cuschinier surmiran ò Nino Niederreiter lia saveir scu tgi chegl seia da luvrar cun saveir tgi igl restaurant e la terrassa seian occupos cumplettamaint? Fadri Arpagaus ò detg tgi seia an amprema lengia en plascheir d'aveir tants giasts, ena tscherta pressiu seia sa tgapescha adegna avant mang.

Tradia ò Nino Niederreiter er tg'el vegia en recept preferia e chegl seia igl recept digls capuns da sia tatta. El ò er anc detg igl suandont: «Cura tg'ia sung an Canada ed an America am mantga igl bung damagler tgi dat aint igl Grischun ed er an Svizra igl pi fitg.» Rachinto ò igl hockeyan er, tgi las muntognas grischunas mantgan fitg. Savens vegia el er malancuneia per la sia famiglia tgi stat a Coira.

An mintga cass ò Nino Niederreiter galdia da cuschinar cun Fadri Arpagaus igls raviauls, alla fegn finala è el pero tuttegn nia tigl conclus da betg barattar igl bastung da hockey cun la palotta da cuschinar.

Da Coira a Carolina

Nino Niederreiter è naschia igls 8 da settember 1992 a Coira. Numno vign el savens er El Niño. Nino Niederreiter ò ena grondezza dad 1,85 meters e peisa 95 kilos. Da preschaint dat el a hockey an Canada cugls «Winnipeg Jets». Antschet la sia carriera da hockey ò el tigl Club da hockey da Coira e sto fidevel a chel club anfignen igl 2006. Sessour ò el do quatter onns pigl Club da hockey da Tavo. Da lò è Nino Niederreiter ia surmar e digl 2009 anfignen ossa dat el ainten la NHL per divers clubs scu per exaimpel igls New York Islanders ed igls Carolina Hurricanes. Cun la squadra naziunala svizra è Nino Niederreiter nia treis gedas vicecampiun mundial (2013, 2018, 2024). Hobis dad el èn golf, badminton, la nateira e sport an general. Dasper igls raviauls da Fadri Arpagaus ò el er gugent raclette.



Nino Niederreiter è sto chesta stad a Coira per trenar durant la pòssa da stad. El è er en'investour digl EHC Coira.

Foto Livia Mauerhofer/Somedia